

編號 3 號

【鷓鴣飛啊飛】張瑞玲原作

打早，日頭正對東片鷓鴣背¹个後背跣起來，輝煌又晟目个金線就射入天頂。佢箭等該臺一騎就響歸路个老鐵馬，來到吾个百果園，還話講佢今晡日日頭一出來就到咗，算當早咧！無胚著，正踏入園肚，隔壁種大梨个阿權哥就在該大聲喊咧：「噯！日頭恁高咧正到哦，敢做有事？」

唉！佢都恁早咧，還輸佢，這阿權哥係歸暗晡毋使睡係無？仰會七早八早就來到？心肝還想等，嘴項又毋肯認輸，順嘴就應佢：「無啦！毋係來做事，來看鷓鴣得咗啦！」

吾个山園在山龍園等个窩壠肚，若係堵著像今晡日恁樣个好天時，打早就會有三、四隻大鷓鴣，在四圍个山嶺頂飛啊飛欸。

同阿權哥个嘴鼓都還言搭煞，聽著遠遠个所在傳來「咻！咻！」个聲，鷓鴣出來咗！阿權哥看著鷓鴣出來，做等个山事也無心做咧，跔等一陣來搨接梨仔个工人，坐在吾工寮个蔭影²下欣賞這齣大自然个表演。

看佢兜閑閑長長个翼胛、跔等氣流，慢慢仔迂、定定仔盤，

越迂越高、緊盤緊遠，到尾變做天邊个一粒烏點，就像係優雅个天頂王者，對天頂看等佢守護个土地。

成半下，還會看著佢兜胸挺挺、目盯盯仔停在胥項个樹極頂高，好恬恬無聲無說就從往下³，一瞬目又轉身飛往上，該尖尖利个爪項，既經夾等一尾挨著神頭个蛇哥，就一路「咻！咻！咻！」風神个飛入塞塞个樹林裡肚咗。

又成時，看佢兜在高高个天頂盤來飛去，忽然間，厥兩片翼胛一收，對天頂直直蹕⁴往下，吾心肝肚還想等：「這隻鷓鴣，這下穩死無命哩！」毋過，看佢硬硬都會撞著地泥咗，厥翼胛一開、利爪一伸，一瞬目時間，該利爪項，毋知哪時又抓著一隻圓身還在該扭啊扭个大老鼠咗。佢一轉身，又飛到半天高咧！

歸陣人看鷓鴣表演看到嘴擘擘仔，有人講：「難怪，在這搭山園做恁久事頭，難得看著蛇哥，就係有這兜鷓鴣守護這搭土地，戴在這四角圍个老嫩大細正有好安生生活啊！」

¹ 鷓鴣背：音 ieu poˋ zuiˋ；東勢東方山峰名，華語稱鷓鴣嘴山。

² 蔭影：音 im iangˋ；陰影。

³ 從往下：音 jiungˊ gongˊ haˊ；往下俯衝。

⁴ 蹕：音 zud；觸擊、衝撞。